

## Filimon Nægkiariien sə rani mə nəfe i nəkukuə

Filimon in iəmə asori riti səvəi nakalasia me fwe Kolosi. In riti nəha Pol. Onesimas, in slef riti səvəi Filimon. In rakres mane səvəi Filimon nənə map mevən fwe Rom. Nəpın in ramarə fwe Rom, in rətoni Pol, mını nıpərhiien ia nəgkiariien səvəi Iesu Kristo. Pol rərhi pen Onesimas ruvehi nəkukuə i mevən muvei pen m Filimon. Pol rəres skai m Filimon mə trəpwəh nərpwiniien noien ərəha səvəi Onesimas nənə mo in rəmwhen ia piəvni. Nəkukuə i rukwakwa. Filimon, Efesas, Kolosi, mıne Filipae kani mə nəkukuə me səvəi kalapus ti nəri nə mə Pol ramarə ia kalapus fwe Rom ia nuk 59-61 mırai nəkukuə me i.

<sup>1</sup> Iou Pol iakamarə ia kalapus ti nəghi Iesu Kristo. Kimrau piəvtaha Timoti iarouni ramasan tukw ik Filimon. Ik iərmama i kitahar mik samaro pəri wok. Kimrau iarouokeikei ik. <sup>2</sup> Nənə iarouni mwi ramasan ti kitirimətaha Apia, mıne piəvtaha Akipas, iəmə sə kitaha min səmwhen ia naruagən me. Iarouni ramasan ti nakalasia me pam nəha səməme kamhousəsimwın irəha me ia nəkwai nimwə səim. <sup>3</sup> Iarouəfwaki mə Kumwesən tata səkitaha mıne Iesu Kristo Iərimənu səkitaha trouəriari pehe namasanien mıne nəməriniuen pwəh irau krauarə tukumiaha.

*Pol raməkwein amasan ia Filimon*

<sup>4</sup> Filimon. Ia nəpɪn me, nəpɪn rerɪk ramrhi ik ia nəfwakiien me səiou, iakani vivi Kumwesən, <sup>5</sup> ti nəri nə mə iakamregi kamini nokeikeiien səim sə ikamo m nərmama me pam səvənhi mine nahatətəien səim ikauvehi ia Iesu Iərimənu səkitaha. <sup>6</sup> Iakamregi mwi mə ikaməriari ia rerim pam ti nəri nə mə ikamahatətə. Iakəfwaki mə noien nəha trasitu ia niram mo ikukurən amasan mwi narimnari amasan me pam kauvei pehe saməuvehi rauku pen ti Kristo. <sup>7</sup> Piak, iakaməfwaki iamɪnhi irə ti nəri nə mə nokeikeiien səim ro nərmama me səvəi Kumwesən rerinraha ragien. Nənə nəpɪn iakregi, iou mwi rerɪk ragien. Ruvehi utə mwi nətərigien səiou.

### *Nəresien səvəi Pol*

<sup>8</sup> Filimon, iakuə takəres nari riti mik. Iakukurən nɪniien nəkwak tukw ik ia nəghi Kristo mə nəfe tikaməkeikei mo, <sup>9</sup> mətə nokeikeiien səkrau, ko iapko mhə iamɪnhi. Iakuə takəres a ik. Təkwtəkwuni iou Pol iakinərgħarə, nənə rəmwhen iakuvəni raka iakamarə ia kalapus ti Iesu Kristo, <sup>10</sup> iakaməres nari riti mik ia nɪkaren səvəi Onesimas,<sup>a</sup> in i səim slef. In ruvehe mətəni iou ia kalapus, nənə iakuvehe məmwhen ia tata səvənhi, in ruvehe nəri. <sup>11</sup> (Fwe kupwən in rɪpkasitu mhə ia niram, mətə təkwtəkwuni nəha in rukurən nasituien ia krau pəri.)

<sup>12</sup> Təkwtəkwuni iakamərhi pehe iəmə i, iəmə sə iakokeikei pɪk, rɪrəriɡ muvehe tukw ik. <sup>13</sup> Iakokeikei mə takəkwtəmhiri əknekɪn ramarə

---

**1:4:** Rom 1:8-9    **1:6:** Fil 1:9, Kol 1:9    **1:7:** 2Kor 7:4    **1:9:** Flm 1    **1:10:** Kol 4:9, 1Kor 4:15    <sup>a</sup> **1:10:** Nɪpwrai nəhag nəha Onesimas in i mə Iəmə sə Ramasitu.    **1:13:** Fil 2:30

kimrau min mə truvehi təmwhekim, mamō tukwini nari miou nəpın iakamarə ia kalapus ti nəgkiariien amasan. <sup>14</sup> Mətə iapkokeikei mhə mə tako nari riti sə ipkəsəni mhə irə. Trini minuə ikamo nəri amasan iakokeikei mə truku pen ia rerim agien, mətə rıpkō mhə nəri iakaməkeikei mik tukwe mə tiko. <sup>15</sup> Rosi Onesimas rınap məpwəh ik nəpın ouihi a mə tikuvehi mwi rouarə rerin kimirau min. <sup>16</sup> Nənə təkwtəkwuni in rıpkō mhə slef əpa riti səim, mətə in rəpi raka slef. In piəvtaha keikei riti. Iou iakokeikei pık in, mətə ik tikokeikei pık in rəpi raka ti nəri nə mə in slef səim, mətə irənhə mwi irə in piam, ti nəri nə mə in ruvəuvehe mamahatətə ia Iərimənu səkitaha.

<sup>17</sup> Ro pen trini minuə ikamətə iou rəmwhen ia ik riti sə krauo pəri wok, tikuvehi in ia rerim pam rəmwhen a mə ikauvehi iou. <sup>18</sup> Trini minuə rino nari riti rərəha ia niram, uə rıməuvehi nari riti mıpkuvehi mhə nənimen, tikəmri pen ia kaon səiou. <sup>19</sup> Iou, Pol, iakamrai nəgkiariien i ia rəgik, iou tapkəraku. (Mətə tikəpwəh nenouenouien mə səim kaon rarə ti nəri nə mə iou iakināsitu ia niram ikuvehi nimiruien vi.) <sup>20</sup> Ouəh, piak, iakokeikei mə tikāsitu ia nirak, mo rerik ragien, ti nəri nə mə krau pəri krauahatətə ia Kristo Iərimənu səkitaha. <sup>21</sup> Iakamrai nəkukuə i mik, mukurən amasan mə tiko nəkwak. Iakukurən mə tiko rəpi raka nəfe nəghin iakaməres i.

<sup>22</sup> Nənə tikəpnəpenə mwi kwopun riti səiou takapri ikın. Iakani iamınhi irə ti nəri nə mə iakameitenhi Kumwesən mə trəsəni nəfwakiien

me sækimiahā, mo suatuk miou iakrærīg pehe tukumiahā.

*Nəgkariien sampam səvəi Pol*

<sup>23</sup> Epafraſ i iou riti sə kımrau min iarouarə ia kalapus ti nəghi Iesu Kristo in rini ramasan tukw ik. <sup>24</sup> Nənə Mak mine Aristakas, mine Temas, mine Luk iou me nepwın səməme iahamo pəri wok, irəha mwi həni ramasan tukw ik. <sup>25</sup> Iakəfwaki mə namasanien səvəi Iesu Kristo Iərimənu səkıtaha tramarə tukumiahā.

**Nəkukuə Ikinan**  
**The New Testament in the Nafe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nafe blong Vanuatu.**  
**Le Nouveau Testament dans la langue Nafe de**  
**Vanuatu.**

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416